



CONSELLO DE GOBERNO 25-11-08 ANEXO I

LIÑAS XERAIS E PROCEDEMENTO PARA A REALIZACIÓN DE TESES DE DOUTORAMENTO EN RÉXIME DE COTUTELA

EXPOSICIÓN DE MOTIVOS

A Universidade de Vigo ten interese en cooperar con outras universidades e organismos de investigación na realización de teses de doutoramento en réxime de cotutela, o cal favorece a mobilidade de estudantes de doutoramento e posibilita a colaboración entre grupos de investigación.

Enténdese cotutela como a dirección conxunta do traballo de investigación conducente á obtención do título de doutor, por parte de investigadores da Universidade de Vigo e doutra universidade ou organismo de investigación (en adiante institucións).

Por todo o exposto, o Consello de Goberno da Universidade de Vigo, na sesión de -- de --- de 2008, acordou aprobar o presente procedemento, que regula a realización de teses de doutoramento en réxime de cotutela.

ARTIGO 1. PRINCIPIOS BÁSICOS

1. Deberanse respectar as lexislacións vixentes para temas de doutoramento existentes en cada país. De ser o caso, terase en conta a normativa para a obtención da mención europea no título de doutor.

2. Asinarase un convenio marco, entre as dúas institucións interesadas, que estableza as liñas xerais de cooperación. Para cada cotutela que se poña en marcha asinarase un convenio específico baseado no principio da reciprocidade, que terá unha duración máxima de tres anos. En virtude do convenio específico, cada institución recoñecerá, a todos os efectos, aos seus investigadores as tarefas de dirección da tese, independentemente do lugar da defensa da tese e da emisión do título de doutor.

3. Os candidatos á preparación do doutoramento en cotutela efectuarán o seu traballo baixo o control e a responsabilidade dun director de tese en cada unha das institucións interesadas.

4. O doutorando inscribirase en cada unha das institucións, pero con dispensa de pago na que non vaia ser lida a tese. No convenio específico indicárase a partida orzamentaria en que se cargará a taxa no caso de que a dispensa lle corresponda á Universidade de Vigo.



5. O tempo de preparación da tese non será superior a tres anos desde a firma do convenio específico e repartirase entre as dúas institucións por períodos de estancia alternativos en cada unha delas. O tempo de estadía mínimo nunha das dúas institucións non será inferior a seis meses, e completarse o período restante na outra. A devandita estadía poderá realizarse dunha soa vez ou en varios períodos.

6. A tese será obxecto dunha defensa única nunha das dúas institucións, que será a encargada da emisión do título coa mención de cotutela coa outra institución implicada.

7. Admitida a tese a trámite, o tribunal ante o que deba defenderse será proposto, de común acordo polas dúas institucións, e a súa composición atenderá á lexislación sobre tribunais vixente no estado ao que pertence a institución en que se defende a tese. O financiamento dos gastos dos profesores estranxeiros que formen parte do tribunal será responsabilidade da institución en que estes actúen. Na devandita proposta deberá figurar polo menos un representante de cada institución.

8. A lingua de escritura e defensa da tese respectará a normativa vixente na institución que emita o título, salvo indicación noutro sentido reflectida no convenio específico.

9. A Comisión de Estudos de Posgrao realizará o seguimento e o control das teses realizadas en réxime de cotutela.

ARTIGO 2. PROCEDEMENTO ADMINISTRATIVO NA UNIVERSIDADE DE VIGO

1. Os reitores (ou representantes legais que correspondan) asinan os convenios de colaboración: marco e específico a proposta da institución en que se vaia ler a tese de doutoramento. Os convenios deberán ser remitidos á Vicerreitoría de Titulacións e Convergencia Europea e aprobados pola Comisión de Estudos de Posgrao.
2. Unha vez asinado o convenio de cotutela específico, o doutorando presentará a solicitude de admisión no programa de doutoramento da Universidade de Vigo seguindo as normas de matrícula ditadas para tal efecto.
3. Oa doutorando formalizará a matrícula en período de tese en cada curso académico mentres estea en vigor a cotutela.
4. Na portada da tese deberá figurar que a tese se realiza en cotutela entre as dúas institucións.
5. O tribunal designarase pola institución en que se vaia ler a tese de doutoramento. Neste tribunal terá que haber algún representante das dúas institucións.

A institución que designe o tribunal enviaralle notificación da designación deste á outra institución, e se nun prazo de 30 días non recibe alegación ningunha considerarase aprobado.



6. En caso de emisión do título na Universidade de Vigo:

- a. A presentación, autorización e defensa da tese de doutoramento seguirá o regulado na Universidade de Vigo.
- b. O doutorando debe engadir ao expediente de solicitude de admisión a trámite da lectura da súa tese de doutoramento unha certificación da/s estancias de investigación expedidas pola outra institución e validadas polo órgano responsable do programa de doutoramento da Universidade de Vigo.
- c. O Negociado de Terceiro Ciclo comprobará o cumprimento dos requisitos establecidos na normativa aplicable, e someterá a tese á aprobación da Comisión de Estudos de Posgrao.
- d. A proposta do tribunal será enviada polo Negociado de Terceiro Ciclo á outra institución. Unha vez recibida a conformidade da outra institución ou pasados trinta días sen resposta, procederase ao nomeamento do tribunal.
- e. Lectura da tese: haberá unha acta en que se especificarán os termos da cotutela (institucións participantes e data de sinatura do convenio específico) e o secretario do tribunal certificará que no tribunal participa algún membro da outra institución.
- f. Recibida a acta de lectura de tese, darase alta no programa informático indicando expresamente a realización de réxime de cotutela coa outra institución e a data da sinatura do convenio específico.
- g. Unha vez solicitado polo interesado o título de doutor procederase ao asento no libro de rexistro de títulos oficiais de doutor, e farase constar no recadro de observacións a súa realización en réxime de cotutela.
- h. O Negociado de Terceiro Ciclo comunicarlle á outra institución a defensa da tese e a solicitude da emisión do título, nun prazo de trinta días a partir do asento do título no rexistro.

7. En caso de emisión do título pola outra institución:

- a. Nun prazo de trinta días a partir do rexistro do título na outra institución, a outra institución achegará á Universidade de Vigo unha certificación en que consten os seguintes datos:
 - i. nome e DNI (ou número de pasaporte) do doutorando
 - ii. título da tese
 - iii. nome, DNI (ou número de pasaporte) e afiliación dos directores da tese
 - iv. data de lectura
 - v. cualificación
 - vi. composición do tribunal
 - vii. denominación do título
- b. O Negociado de Terceiro Ciclo procederá ao asento no libro de rexistro de teses de doutoramento en cotutela lidas noutras institucións.



ARTIGO 3. DISPOSICIÓN ADICIONAL

No suposto de cotutela de tese de doutoramento, será de aplicación a súa normativa propia, e será esta supletoria en todo o que non estea previsto nela.

Para o non previsto nesta normativa será a Comisión de Estudos de Posgrao a encargada de resolver.

DISPOSICIÓN FINAL

A presente normativa entrará en vigor ao día seguinte da súa aprobación polo Consello de Goberno da Universidade.